

401 - Gwaith Llafar wedi'i recordio Blwyddyn 6 ac Iau (Dysgwyr)

Thema – Achlysuron Arbennig

Beirniad – Christine Roberts

Er ei bod yn siomedig mai dim ond tri grŵp sydd wedi cystadlu eleni rhaid canmol y tri cyflwyniad sain safonol a dderbyniwyd ac mae'r tri grŵp yn haeddu llwyddiant. Roedd dau grŵp, Cewri Cei a Sgrabs wedi creu sgwrs ar ffurf rhaglen radio ac roedd aelodau o'r grŵp yn holi ei gilydd am eu hoff achlysuron yn ystod y flwyddyn ysgol. Yn y sgwrs a greuwyd gan Barti Y Dyffryn roedd aelodau o'r grŵp yn ceisio dyfalu pa achlysur arbennig oedd yn mynd i gael ei gynnal yn Ninbych.

Yn ogystal â defnyddio amrywiaeth eang o batrymau iaith priodol mae'n bwysig bod y sgwrs yn ddiddorol ac yn naturiol. Mae angen ystyried nifer o ffactorau fel hyder ymhlith aelodau o'r grŵp, ynganu a goslefu cywir, mynegiant priodol ac emosiwn. Mae'n bwysig hefyd bod pob llais yn glir.

Trafodwyd llawer o achlysuron arbennig gan Cewri Cei gan gynnwys y Sioe a'r Ffair Nadolig, Noson Rhyngwladol, Yr Eisteddfod, Diwrnod Mabolgampau a Dydd Santes Dwynwen felly roedd cyfleoedd da i holi ac ateb, mynegi barn a rhoi gwybodaeth am y gweithgareddau a gynhelir. Roedd y grŵp yn hyderus ac er y collwyd tŷ naturiol y sgwrs ambell waith llwyddwyd i ddefnyddio amrywiaeth eang o batrymau iaith yn effeithiol.

Dechrau effeithiol gan Strabs gan ddefnyddio darn byr o fiwsig bywiog i gyflwyno eu rhaglen radio. Trafododd y disgyblion nifer helaeth o achlysuron arbennig yng nghalendr yr ysgol gan ddefnyddio amrywiaeth da o batrymau iaith. Roedd yr holi ac ateb, mynegi barn a'r wybodaeth am eu gweithgareddau yn ddiddorol ac yn glir. Ar y cyfan llwyddodd y grŵp i gynnal trafodaeth naturiol gyda mynegiant priodol.

Roedd Parti Y Dyffryn wedi gwneud cyflwyniad bywiog a llawn hiwmor. Wrth ddyfalu pa achlysur arbennig oedd yn mynd i gael ei gynnal yn Ninbych cynigwyd ffair, syrcau a Gŵyl Rholio Cennin. Defnyddiodd y disgyblion batrymau iaith amrywiol ond roedd ambell ddarn aneglur a chafwyd trafferth i ynganu nifer o eiriau e.e cystadleuaeth, gweithgareddau, Urdd. Heblaw am hynny roedd yn braf clywed brwdfrydedd yn y lleisiau.

Cystadleuaeth agos iawn. Llongyfarchiadau i'r ymgeiswyr i gyd a daliwch ati!

1af	STRABS	401.2
2il	CEWRI CEI	401.1
3ydd	Parti Y Dyffryn	401.3